

Tuzlanska ljekovita murijatična voda sadržava kuhinjske soli, te se za piće upotrebljava protiv katara želuca, kada ne luči dovoljno želučane kiseline, i protiv skrofuloze.

Hotel Bristol.

Obavještenja: Društvo planinara u B. i H., sekcija Tuzla.

SLANA BANJA SIMIN HAN

(SOLANA KREKA)

Pet kilometara daleko od Tuzle na produšku željezničke pruge Dobož—Tuzla leži državno lječilište Slana Banja solane Kreka u Siminhanu. Kupanje u slanoj vodi, koja se crpenjem dobija iz dubine zemlje od 500 m. Liječi skrofulozu, reumatizam zglobova i mišića, išijas, živčana oboljenja od reumatizma, bolove u krstima, kožne bolesti, hronična oboljenja ženskih organa, sklerozu i razne uzetosti. Ljekovita sredstva: Inhalacije slanom parom, kupanje s ugljičnom kiselinom.

Sezona traje od maja do oktobra.

Obavještenja: Uprava Slane Banje solane Kreka, Siminhan (kod Tuzle).

PALE

Sarajevu na istok (23 km) na željezničkoj pruzi Beograd—Užice—Sarajevo leži klimatsko lječilište i ugodno ljetovalište Pale (832 m) usred krasnih gustih jelika, s vanredno svježim planinskim vazduhom.

Pale je omiljeno ljetovalište Sarajlija, te ljeti u nedjelju i o blagdanima voze posebni izletnički vozovi. Autobusna veza sa Sarajevom svakog dana.

Pale je odlična polazna tačka za izlete u planine: na Golub Jahorinu (1913 m), Romaniju (1647 m).

Prirodno kupalište u rijeci.

Obavještenja: »Putnik«, Sarajevo.

VIŠEGRAD

U šumovitu i bregovitu kraju, na utoku Rzave u Drinu, leži Višegrad (344 m). Spominje se još u 15 vijeku kao značajna stanica na trgovačkoj cesti Dubrovnik—Niš i Sarajevo—Carigrad. Višegrad je ujedno i znatna strateška tačka u povijesti Bosne, što se vidi po ruševinama staroga grada iznad mesta i u novije doba po velikomu mostu, koji sagradi Mehmed-paša Sokolović (rodnom iz nedalekog Sokolca, do koga je veoma zanimljiv izlet). Most je dug 170 m i podignut na 11 lukova. Za svjetskoga rata dignut je jedan dio mosta lagumom, pa je kasnije taj dio mosta nadomješten željeznom konstrukcijom.